

Weh Wi Ga Fi Seh

Kip sayf fahn di vairos!
Kip op yu helt.

How Yu Krismos 2021 di Luk?

Weh Krismos 2021 di luk laik fi yoo, yu **famili**, ahn yu **faamli**?

“famili” eena Kriol:

Dis rifa tu yu ma, pa, breda, sista, graama, granpa—weh English seh az yu “immediate family.”

“faamli” eena Kriol:

Dis rifa tu yu kozn (fos, sekan, er moa), yu onkl, aahnti—weh English kaal yu “extended family.”

Ih haad fi tink agen laik bifo *Covid-19*. Hoo ku tink bowt put een nyoo maali? Fos ting, moni tait tait. Sohn a wi bayli di goh lang, laas wi jab er ga kot salari. Ahn disya *COVID* di stik rong laik bloo konkas. Ih jos noh waahn goh weh. Ih kip di weel ahn ton agen. **Delta, Omicron** ... weh neks? How wi ku tink a palish op wi priti boad fernicha! Ahn sohn a wi maita waahn paynt op di plays fu Krismos laik wi doz du bifo dis *COVID* staat op ahn tek wi lee moni. Bot wi jos kyaahn du it dis yaa.

Lat a wi di sata hoahn, ahn da noh jos sayk a kerfyoo. Wi jos nat eevn ga di feelin fi di goh owt ahn bowt di plays. Ahn noh jos sayk a wi moni tait tait dis yaa. Maybi di yonga pipl waahn. Bot mee ahn lat a mi fren dehn wen don oava 60 yaaz oal jos waahn dehn wid famili, ahn if pasibl, wid faamli. Maybi di bes gif wi ku gi dis Krismos da jos fi tel wi famili ahn faamli dehnya spesha wod dehn:

Ah lov yu, mi famili. Ah lov yu mi faamli.